



BARINGKUAS

REBOLUSYONARYO A DYARYO TI UMILI ITI CAGAYAN VALLEY

TAWEN 2003 BLG.1

ISPESYAL NGA ISYU

P10.00

IPATEG TI BARO A BUYOT TI UMILI!



Tallopulo ket uppat a tawen ti naglabasen manipud idi naitakder ti NPA idi Marso 29, 1969. Nangrugi iti sumagmamano a taw-an ken armas, ti NPA ita ket agtigtignay iti nasurok 129 a larangan a gerilya iti intero a pagilian, nga addaan pinullo a ribu a mannakigubat.

Narimat ti pakasaritaan ti NPA ken umili ti Cagayan Valley manipud pay kadagiti umuna a tawen ti dekada 1970. Pakasaritaan ti dadakkel ken naririmat a balligi, a nagun-od babaen ti agkuykuyog a pigsa, regget ken determinasyon iti armado a rebolusyon.



Kasano pay a makalaban ti umili kadagiti kabusor na no awan ti NPA?

Nagkuyog da a nanggun-od ti balligi iti panangipatungpal ti rebolusyon agraryo tapno in-inut a mapakapsut ti bileg dagiti apo't daga iti kaaw-awayan. Iti laban tapno maibaba ti abang iti daga. Iti panangirupir ti karbengan iti panagtagikua kadagiti suksukayen a daga. Iti panangibaba ti interes iti pautang. Kadagiti kampanya ti

panangpadur-as ti ammuyo ken dadduma pay a langa ti kooperasyon tapno maingato ti produksyon.

Ti NPA ti kakuyog ken katulong ti mannalon iti pananglaban kadagiti dadakkel nga apo't daga, kas iti panagballigi ti laban idi 1982-83 iti Amianan a Laud nga Isabela. Pinanggep ni Danding Cojuangco nga agawen ti daga dagiti mannalon iti Hacienda San Antonio ken Sta. Isabel. Napaay daytoy a gandat na idi nagkaykaysa a nagtignay ti rinibribo a mannalon ken milyon a tagasuporta da, babaen ti pannakikaykaysa ken tulong ti NPA iti uneg ti pannarabay ken panangidaulo ti Partido Komunista ti Pilipinas.

Kasta met, timmulong ti kakadua iti panagrisut kadagiti risiris dagiti mannalon kanaig ti daga. Naregget daytoy a nangikampanya ti panangidur-as ti kinadalus ken salun-at kadagiti baryo. Kagiddan na, agnanayon nga awit ti NPA ti panggep a wayaan ti umili manipud iti bulok ken ideyalista a kapanunotan ken kultura.

Agkakuyog a naitakder ti Hukbo ken umili dagiti organisasyon masa, dagiti bin-i ti bileg a pampulitika a mulat nga agad-adal ken lumalaok kadagiti pampulitika a panagtignay.

Nagtinnulong da iti panangirussuat kadagiti taktikal nga opensiba laban kadagiti napeklan a peste ti umili ken armado a taw-an ti AFP. Kas ti panangdusa kadagiti addaan nadadagsen nga utang a dara, kas kenni Col. Rodolfo Aguinaldo. Kadagiti soldado ken aso-aso ti reaksyunaryo a kabiagan ken pagsayaatan ti umili.

Kabadang isuda ti umili tapno mapagtalinaed ti talna ken kappia iti uneg ti barbaryo; mapagtalinaed ti naindasigan a panaglilinnangen, ken maliklikan dagiti dakes nga aramid. Napukaw ti panagkuraddog, panagsugal ken riribuk kadagiti lugar a napigsa ti panagtinnulong ti NPA ken umili.

Pudno la unay, no awan ti Hukbo, awan aniaman ti umili!

Saan a napugsat ti panagkaykaysa ti hukbo ken umili iti sango man ti panagranggas, panangallilaw ken panangbutbuteng ti reaksyunaryo a gobyerno. Kalpasan ti adu a kampanya da, a “mangibus ken mangparmek” iti rebolusyonaryo a tignayan, tallopulo ket uppat a tawen nga awan-sarday a panaglaban ti itultuloy tayo.

Nairut a pagig-iggeman ti NPA ti panangipangruna iti interes ti umili sakbay ti amin. Dagiti kangrunaan a parikut ti umili agingga kadagiti usapin iti inaldaw-aldaw a biag. Gapu ta isu ti pudno a buyot ti umili, iggem na iti amin a panawen ti landok a disiplina iti panangipatungpal kadagiti rebbengen ken iti pannakilangen iti masa.

Kadawyan nga istorya dagiti masa ti maysa a pangallilaw dagiti soldado tapno agpammarang kas NPA. Aglupot da kadagiti kadawyan nga us-usaren ti NPA. Agawag ti “kadua”. Padasen da a tuladen ti tignay ti NPA.

Ngem, kas iti maysa a nasinged a gayyem, nagannak ken kadasig, ammo ti masa ti pudno a Hukbo. No sinno ti buyot a pudno a managayat ken manangisaksakit iti umili.

Isu a nabara ti panagsuporta ti umili iti hukbo da. Ti NPA ti mangibagbagi iti lumablabaan nga umili. Naggapu kanya da. Para kanya da. Isu a rumbeng nga ipaay ti umili ti kaiingetan a suporta da.



Ited ti moral ken materyal a suporta! Napateg unay ti pannangted ti masa kadagiti pakasapulan dagiti mannakigubat. Iti langa man ti gamit, wenno pinansya. Ited pay ti suporta iti panangbukel ken panangpatibker ti mapanglaban a kapanunotan.

Ti masa ti katulong ti Hukbo iti sakit ken salun-at. Iti rigat ken nam-ay. Isu da ti kaykaysuna a pagsangsanggirang ti Hukbo iti amin a kasapulan na. Saan a kas iti reaksyunaryo a buyot nga AFP, ti NPA ket makipagbiag ken nakaramut iti masa.

Ituloy tayo ti nabara a panagpasangbay kadagiti ipatpateg tayo a mannakigubat. Ti boluntaryo a pannangted kadagiti taraon, agas, lupot ken dadduma pay a kasapulan.

Agtignay para iti armado a rebolusyon! Kasta met, malaksid ti panagsuporta, rumbeng nga ipaay ti umili ti amin nga pigsa ken kabaelan da iti mismo a panagtignay ti armado a rebolusyon.

Adu ti langa ti panagtignay para iti armado a rebolusyon. Panangaywan ti seguridad. Panagakem kadagiti rebbengen iti panagorganisa, panagpamulat ken panagpatignay iti kaaduan nga umili. Panagsuporta kadagiti mairussuat a taktikal nga opensiba.

Ti panagtignay ti masa ket maigapu iti mulat nga inisyatiba da. Maigapu iti pannakaawat a ti rebolusyon ket maysa a gubat ti umili ken maipagballigi laeng babaen ti direkta nga ilalaok da.

Sumampa iti NPA! Kapatgan iti amin, rumbeng a sumilpo iti rebolusyon dagiti amin a magungundawayan babaen ti mismo a panagkameng iti NPA.



Amin nga umili, nga adda iti husto nga edad (manipud 18 tawen agpangato), nasalun-at a bagi ken panunot, ket mabalin a sumampa iti NPA. Aniaman ti kinatao ken puli a naggapuan. Siasinnoman a nakaawat ti panggep ti nailian-demokratiko a rebolusyon ken mangtartarigagay ti pudno a demokrasya ken wayawaya.

Ti masa ti saan a maatianan nga ubbog ti pigsa ti rebolusyon. Iyabante tayo ti pakasaritaan ti nailian-demokratiko a rebolusyon. Iti maika-34 a tawen ti pannakaibangon daytoy, pasingkeda tayo ti naindaklan a rebbengen ti umili iti panangipateg ti pudno a Hukbo da—ti NPA!